

CONVENIO DE COLABORACIÓN ENTRE A VICEPRESIDENCIA PRIMEIRA E CONSELLERÍA DE PRESIDENCIA, XUSTIZA E TURISMO E MAIS A FEDERACIÓN GALEGA DE ASOCIACIÓNS EN FAVOR DAS PERSOAS CON DISCAPACIDADE INTELECTUAL OU DO DESENVOLVEMENTO (FADEMGA), PARA A REALIZACIÓN DUN PROXECTO DE ADAPTACIÓN DE SENTENCIAS XUDICIAIS A LECTURA FACIL

Santiago de Compostela, 30 de marzo de 2021

REUNIDOS

Dunha banda, **Juan José Martín Álvarez**, Director Xeral de Xustiza, facultado para a sinatura deste convenio de colaboración por Orde do Vicepresidente Primeiro e Conselleiro de Presidencia, Xustiza e Turismo, de data 15 de marzo de 2021



Doutra banda, **M^a Carmen González Lagarón**, vicepresidenta da Federación Galega de Asociacións en favor das Persoas con Discapacidade Intelectual ou do Desenvolvemento (FADEMGA), en representación desta federación, por delegación do seu Presidente por acordo de data 25 de marzo de 2021.

EXPOÑEN:



Primeiro. A Federación Galega de Asociacións en favor das Persoas con Discapacidade Intelectual ou do Desenvolvemento (FADEMGA Plena Inclusión Galicia), é unha entidade sen ánimo de lucro que conta na actualidade con 40 entidades galegas federadas que prestan servizo a 6.325 persoas con discapacidade intelectual. As entidades de FADEMGA están formadas por unha rede de 125 centros nas catro provincias galegas, nas que traballan un total de 1.291 profesionais e contan co apoio de 1.234 voluntarios. FADEMGA ofrece servizos ás persoas a través das súas entidades e ademais dende os programas que se desenvolven dende a propia federación, como son: o programa de “Atención a familias”, o programa “Atención integral a persoas con discapacidade intelectual reclusas e ex-reclusas ou sometidas a medidas alternativas”, o programa para a “prevención do delito, violencia e discriminación contra persoas con discapacidade intelectual ou do desenvolvemento”, etc.

Segundo. A Convención dos Dereitos das Persoas con Discapacidade inclúe o dereito de acceso á xustiza na seu artigo 13 e garante o acceso en igualdade de condicións. Tamén prevé a adopción de medidas de accesibilidade, axustes de procedemento e prestación dos apoios necesarios para poder exercer os dereitos en igualdade de condicións. Así mesmo a Lei de accesibilidade de Galicia 10/2014 do 3 de decembro, contempla na súa artículo 34 que as Administracións públicas adaptasen os sistemas de comunicación para facelos accesibles e comprensibles para todas as persoas, empregando a lectura fácil, por ser unha solución de accesibilidade que fai posible que persoas con problemas de comprensión lectora poidan acceder á información.

Terceiro. A discapacidade intelectual implica unha serie de limitacións nas habilidades que a persoa aprende para funcionar na súa vida diaria e que lle permiten responder ante distintas situacións e lugares. Esta discapacidade exprésase na relación coa contorna. Por tanto, depende tanto da propia persoa como das barreiras ou obstáculos que ten ao redor. Se logramos unha contorna máis fácil e accesible, as persoas con discapacidade intelectual terán menos dificultades, e por iso, a súa discapacidade parecerá menor. Ás persoas con discapacidade intelectual cústalles máis aprender, comprender e comunicarse, e en particular, presentan maiores dificultades para entender o proceso xudicial e o seu resultado, debido ás barreiras cognitivas e estruturais que presenta a xustiza. Coa finalidade de paliar esta situación, a FADEMGA está a desenvolver o proxecto "Adaptación de sentenzas a lectura fácil", co que pretende mellorar o acceso á xustiza das persoas con discapacidade intelectual

Cuarto. Á Vicepresidencia Primeira e Consellería de Presidencia, Xustiza e Turismo, de conformidade co disposto Decreto 214/2020, do 3 de decembro, polo que se establece a súa estrutura orgánica, correspóndenlle, entre outras, as competencias en materia de asociacións e fundacións, sendo unha das súas liñas prioritarias o fomento daquelas actividades que, promovidas por entidades sen fins de lucro, presten apoio e promovan a dotar de maior exemplaridade as accións da sociedade para que as persoas con discapacidade intelectual ou de desenvolvemento teñan acceso á Administración de xustiza en igualdade de condicións que o resto dos cidadáns.

Quinto. A Vicepresidencia Primeira e Consellería de Presidencia, Xustiza e Turismo e mais a Federación Galega de Asociacións en favor das Persoas con Discapacidade Intelectual ou do Desenvolvemento (FADEMGA) queren impulsar novos xeitos de colaboración que posibiliten o acceso á Xustiza en Galicia ás persoas con discapacidade intelectual ou de desenvolvemento, a través do programa "Adaptación de sentenzas a lectura fácil", de modo que durante o procedemento xudicial

infórmase á familia ou defensor xudicial da posibilidade de adaptar a sentenza a lectura fácil, para que soliciten devandito servizo á FADEMGA Plena inclusión. Deste xeito, co consentimento da persoa con discapacidade ou do seu defensor xudicial remítese o documento (cédula de emprazamento, sentenza de xuízo sobre determinación da capacidade, auto Internamento, etc) a FADEMGA para realizar a súa adaptación. Os técnicos de FADEMGA Plena inclusión Galicia adaptan o documento xurídico a lectura fácil, e unha vez adaptado, un grupo de persoas con discapacidade intelectual validan devandito documento para garantir a súa comprensión.

Sexto. Conforme o establecido no artigo 26.2 da Lei 9/2007, do 13 de xuño, de subvencións de Galicia, faise constar que neste convenio non son de aplicación os principios de publicidade e concorrência pública, xa que a Federación Galega de Asociacións en favor das Persoas con Discapacidade Intelectual ou do Desenvolvemento (FADEMGA) é a única federación que realiza na súa zona xeográfica actividades específicas para o achegamento da Xustiza ás persoas con discapacidade intelectual ou de desenvolvemento.

Oitavo. A entidade cumpre cos requisitos para obter a condición de beneficiario da subvención, de acordo co disposto no artigo 10 da Lei 9/2007, do 13 de xuño, de subvencións de Galicia.

En consecuencia, ao abeiro do exposto, e no exercicio das funcións que lles son propias, as partes asinantes acordan outorgar o presente convenio de colaboración con base nas seguintes

CLÁUSULAS:

Primeira. Obxecto

O obxecto deste convenio é establecer as bases da colaboración entre a Vicepresidencia Primeira e Consellería de Presidencia, Xustiza e Turismo e mais a Federación Galega de Asociacións en favor das Persoas con Discapacidade Intelectual ou do Desenvolvemento (FADEMGA Plena Inclusión Galicia) para a implantación por esta dun proxecto de adaptación de sentenzas e outros documentos xudiciais a lectura fácil para persoas con discapacidade intelectual ou de desenvolvemento. En particular, o obxecto deste convenio consiste no apoio financeiro á FADEMGA para que esta poida desenvolver o seu proxecto denominado "Adaptación de sentenzas á lectura fácil" que se desenvolverá nos seguintes xulgados de Galicia:

- Xulgado de Primeira Instancia nº 6 de Santiago de Compostela

- Xulgado de Instrución nº 1 de Santiago de Compostela
- Xulgado de Primeira Instancia nº 6 de Ourense
- Xulgado de Primeira Instancia nº 12 de Vigo
- Xulgado de Primeira Instancia nº 15 de Vigo
- Xulgado de Primeira Instancia nº 5 de Pontevedra
- Xulgado de Primeira Instancia e Instrución nº 1 Cambados
- Xulgado de Primeira Instancia e Instrución nº 2 Cambados
- Xulgado de Primeira Instancia e Instrución nº 3 Cambados
- Xulgado de Primeira Instancia e Instrución nº 4 Cambados

Segunda. Obrigas da Federación

A Federación Galega de Asociacións en favor das Persoas con Discapacidade Intelectual ou do Desenvolvemento (FADEMGA) comprométese a:

1. Realizar as actividades previstas no proxecto que se recolle neste convenio. A dotación de persoal dedicada a estes fins estará sometida ás directrices e ordes da federación, e o dito persoal non terá relación laboral coa Vicepresidencia Primeira e Consellería de Presidencia, Xustiza e Turismo.
2. Difundir a existencia do seu proxecto de actividades, informando aos profesionais da Administración de xustiza en Galicia das posibilidades de apoio que supón para os órganos xudiciais.
3. Destinar os fondos percibidos ao financiamento dos gastos necesarios para levar a cabo as actuacións referidas na cláusula primeira.
4. Poñer á disposición da autoridade xudicial, cando así sexa solicitado por esta, información relativa aos posibles destinatarios do uso.
5. Difundir o contido das actividades desenvolvidas pola FADEMGA relacionadas co teor do presente convenio, mediante a realización de actuacións informativas, seminarios e xornadas técnicas.
6. Achegar á Administración autonómica, cando lle sexa solicitada, información sobre as actividades realizadas.
7. Consentir expresamente a inclusión dos datos relevantes deste convenio nos rexistros públicos que proceda, de conformidade coa disposición adicional do Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, dos orzamentos xerais da Comunidade Autónoma de Galicia para o ano 2006, e mais co artigo 16 da Lei 9/2007, do 13 de xuño, de subvencións de Galicia.
8. Dar axeitada publicidade ao carácter público do financiamento das actuacións obxecto do presente convenio, cumprir todas as condicións e obrigas recollidas nel e someterse ás actuacións de supervisión e control previstas no mesmo, así como observar as demais obrigas esixidas no artigo 11 da Lei 9/2007, do 13 de xuño.

Este convenio será obxecto de publicación, de acordo co previsto na Lei 1/2016, do 18 de xaneiro, de transparencia e bo goberno da Administración pública galega. Así mesmo, incluírase no Rexistro Público de Axudas, Subvencións e Convenios, de conformidade co Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006, e mais co artigo 16 da Lei 9/2007, do 13 de xuño, de subvencións de Galicia.

As partes asinantes do convenio manifestan o seu consentimento para que os datos persoais que constan neste convenio, así como o resto das especificacións contidas no mesmo, poidan ser publicados no Portal de transparencia e Goberno aberto

9. Prestar a colaboración e facilitar canta documentación lle sexa requirida no exercicio das funcións de control que lle corresponden á Intervención Xeral da Comunidade Autónoma ao Consello de Contas e ao Tribunal de Cuentas.

10. As partes asinantes virán obrigadas en materia de protección de datos a cumprir co Regulamento (UE) 2016/679 do Parlamento Europeo e do Consello, de 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE (Regulamento xeral de protección de datos) e demais disposicións vixentes sobre a materia”

Terceira. Obrigas da Vicepresidencia Primeira e Consellería de Presidencia, Xustiza e Turismo

A Xunta de Galicia, a través da Vicepresidencia Primeira e Consellería de Presidencia, Xustiza e Turismo, colaborará na realización das actuacións a que se refire a cláusula primeira deste convenio achegando a cantidade máxima de DEZ MIL EUROS (10.000,00 €), con cargo á aplicación orzamentaria 05.22.131A.481.0 dos orzamentos xerais da Comunidade Autónoma para o ano 2021, como contribución aos gastos soportados pola FADEMGA pola realización do seu proxecto de actividades.

Cuarta. Libramento de fondos

A achega económica da Vicepresidencia Primeira e Consellería de Presidencia, Xustiza e Turismo realizarase nos termos requiridos no artigo 51 do Decreto 11/2009, do 8 de xaneiro, polo que se aproba o Regulamento da Lei de subvencións de Galicia.

A FADEMGA incorporará, por unha banda, unha memoria de actuación xustificativa do cumprimento das condicións impostas na concesión da subvención, con indicación das actuacións realizadas e dos resultados obtidos; e, por outra, unha relación clasificada dos gastos da actividade, na que se faga constar: a identificación do acredor e do documento, xunto co seu importe, data de emisión e data de pagamento; un detalle doutros ingresos e subvencións que financiasen a actividade subvencionada, con indicación do importe e da súa procedencia; e, se é o caso, carta de pagamento do reintegro no suposto de remanentes non aplicados, así como dos xuros derivados destes.

O representante da FADEMGA Plena Inclusión Galicia acreditará a realización das actividades financiadas estendendo certificación do cumprimento da finalidade para a que foi concedida a axuda.

Con anterioridade á xustificación da execución da actividade presentárase unha declaración do conxunto de axudas solicitadas –tanto das aprobadas ou concedidas coma das pendentes de resolución– para un mesmo proxecto das distintas administracións públicas competentes ou das súas entidades vinculadas ou dependentes.

Á vista desta documentación, o órgano competente da Vicepresidencia Primeira e Consellería de Presidencia, Xustiza e Turismo expedirá certificación acreditativa do cumprimento dos fins obxecto do convenio.

En todo caso, a cantidade máxima que se obriga a achegar a Vicepresidencia Primeira e Consellería de Presidencia, Xustiza e Turismo reducirase na mesma proporción que represente a cantidade xustificada respecto do orzamento total presentado pola FADEMGA, que servirán de referencia para a determinación final do importe da subvención, calculando este como unha porcentaxe do custo final da actividade, o pago realizarase pola parte proporcional da contía da subvención efectivamente xustificada, calculado en función da porcentaxe subvencionada do custo final da actividade.

Cando as actuacións obxecto do convenio fosen financiadas, ademais de coa subvención, con fondos propios ou con outras subvencións ou recursos, deberá acreditarse na xustificación o importe, a procedencia e a aplicación de tales fondos ás actividades subvencionadas, de conformidade co establecido no artigo 28.6 da Lei 9/2007, do 13 de xuño, de subvencións de Galicia. O eventual exceso de financiamento público calcularase tomando como referencia a proporción que debe alcanzar dita achega respecto do custo total, quedando por conta do beneficiario a diferenza de

financiamento necesario para a total execución da actividade subvencionada, debendo ser reintegrada en tal caso o financiamento público unicamente polo importe que superase o custo total da actividade.

No caso de que se produza un exceso das subvencións percibidas de distintas administracións públicas, a FADEMGA deberá reintegrar o exceso e mais os xuros de mora, nos termos que establece o artigo 23 do Decreto 11/2009, do 8 de xaneiro.

Ao abeiro deste convenio poderán financiarse os gastos nos que incorrera a FADEMGA como consecuencia da realización de actuacións acordes co obxecto de convenio e que se efectuaran con anterioridade á sinatura do mesmo, sempre que se trate de gastos correspondentes ao actual exercicio económico.

O prazo para presentar a documentación xustificativa da subvención será dende a formalización do convenio ata o 30 de novembro de 2021.

Quinta. Gastos subvencionables.

Con carácter xeral, e de acordo co establecido no artigo 29 da Lei 9/2007, do 13 de xuño, xeral de subvencións de Galicia, consideraranse gastos subvencionables aqueles que de xeito indubidable respondan á natureza da actividade subvencionada e se realicen dentro do período comprendido entre o 1 de xaneiro de 2021 e a data límite de xustificación. En ningún caso o custo de adquisición dos gastos subvencionables poderá ser superior ao valor de mercado.

Os custos indirectos –tales como axudas de custo, viaxes ou consumibles– formarán parte da xustificación da subvención, sempre que sexan imputados pola FADEMGA á actividade subvencionada e en todo caso na medida en que tales custos correspondan ao período en que efectivamente se realiza a actividade, e con data de xustificación comprendida entre o 1 de xaneiro de 2021 e a data límite de xustificación.

Sexta. Pagos parciais

A achega económica da Vicepresidencia Primeira e Consellería de Presidencia, Xustiza e Turismo poderá instrumentarse mediante pagamentos parciais, a pedimento da FADEMGA, ata un máximo do 80% da contía total da achega, de acordo co disposto no artigo 62 do Decreto 11/2009, do 8 de xaneiro, e no 31.6 da Lei 9/2007, do 13 de xuño, de subvencións de Galicia, dentro do límite da

respectiva anualidade orzamentaria e atendendo ao ritmo de execución da actividade subvencionada.

Para a realización de pagamentos parciais a FADEMGA deberá xustificar que se realizaron actuacións relacionadas co obxecto do convenio, así como o seu pagamento. Os pagamentos parciais quedarán condicionados ao resultado da liquidación definitiva.

De acordo co establecido no artigo 11.d) da Lei 9/2007 e no Decreto 11/2009, do 8 de xaneiro, antes de efectuar o primeiro pago parcial da achega económica da Administración autonómica, a FADEMGA deberá presentar unha declaración do conxunto de todas as axudas concedidas para este mesmo fin ante as administracións públicas ou outros entes públicos. Con carácter previo á tramitación do derradeiro pagamento, a entidade deberá presentar unha declaración complementaria do conxunto das axudas solicitadas para a mesma actuación das distintas administracións públicas ou das entidades vinculadas ou dependentes das mesmas.

Sétima. Compatibilidade con outras axudas

De acordo co disposto no artigo 40.1.d), do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, a achega económica prevista no presente convenio será compatible con outras subvencións, ingresos ou recursos para a mesma finalidade procedentes de calquera Administración ou entes públicos ou privados nacionais, da Unión Europea ou de organismos internacionais.

Oitava. Publicidade

En toda difusión ou publicidade que xere a realización das actividades recolleitas no presente convenio, farase referencia expresa á colaboración levada a cabo entre a Vicepresidencia Primeira e Consellería de Presidencia, Xustiza e Turismo e mais a FADEMGA, incluíndose a imaxe corporativa de ambas as dúas institucións.

En cumprimento do disposto nos artigos 18 e 20.8 da Lei 38/2003, do 17 de novembro, xeral de subvencións, comunicarase a subscrición deste convenio á Base de Datos Nacional de Subvencións, que opera como sistema nacional de publicidade de subvencións.

Novena. Seguimento do convenio

Para facilitar o seguimento e cumprimento do convenio constituirase unha comisión mixta, integrada por un representante da Vicepresidencia Primeira e Consellería de Presidencia, Xustiza e Turismo e un representante da FADEMGA.

A Comisión Mixta ditará as súas propias normas de funcionamento e deberase reunir cando o solicite algunha das partes. As súas funcións serán:

- interpretación do convenio
- proposta, se é o caso, de addendas
- intervención previa á resolución por incumprimento
- acordo previo para a realización das actuacións recolleitas na cláusula oitava
- calquera outra relacionada co desenvolvemento do presente convenio

Décima. Causas de resolución

O presente convenio resolverase:

- a) Por incumprimento total ou parcial dalgunha das cláusulas que o regulan.
- b) Polo transcurso do tempo fixado sen que se execute o investimento obxecto da subvención.

De se resolver o convenio, a Vicepresidencia Primeira e Consellería de Presidencia, Xustiza e Turismo poderá, se é o caso, esixir o reintegro das cantidades achegadas. Igualmente, de conformidade co disposto no artigo 17.3 da Lei 9/2007, do 13 de xuño, procederá o reintegro do exceso percibido no suposto de que o importe da axuda –illada ou en concorrencia con subvencións e axudas, ingresos ou recursos– supere o custo da actividade subvencionada.

Décimo primeira. Vixencia do convenio

A vixencia do presente convenio estenderase dende a súa sinatura ata o cumprimento, polas partes, das obrigas asumidas. En ningún caso excederá o 30 de decembro de 2021.

Décimo segunda. Natureza do convenio

O presente convenio ten natureza administrativa. As discrepancias que xurdan pola súa aplicación serán resoltas, precedendo informe ou proposta da comisión de seguimento, pola Vicepresidencia Primeira e Consellería de Presidencia, Xustiza e Turismo, quedando as partes suxeitas á xurisdición contencioso-administrativa para a resolución de calquera conflito que poida xurdir na súa aplicación.

Décimo terceira. Normativa aplicable

O presente convenio rexeráse polo disposto na Lei 9/2007, do 13 de xuño, de subvencións de Galicia, e mais no Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.

E en proba de conformidade co expresado neste convenio, é asinado polas partes comparecentes no lugar e data que se indican no encabezamento.

O Director Xeral de Xustiza



Juan José Martín Álvarez

A Vicepresidenta da Federación Galega de
Asociacións en favor das Persoas con
Discapacidade Intelectual ou do
Desenvolvemento (FADEMGA),



Mª Carmen González Lagarón



FADEMGA
Plena
inclusión
Galicia